

ARLEF: CRESSITE ECONOMICHE E OCUPAZION CUL MULTILINGUISIM

Si 'nt fevele a Bruxelles cu la nestre regjon tant che protagoniste

Il Friûl-VJ, cun dute la ricjece des sôs diversitâts linguistichis, al disbarcje a **Bruxelles** in graciis dal **Npld (Network to promote linguistic diversity)**, de **Regjon** e de **ARLeF (Agenzie Regjonâl pe Lenghe Furlane)**. La ocasion e sarà chê dal **seminari** organizât de impuartante rêt comunitarie che, ai **27 di Otubar**, par dute une zornade e cui intervents di une desene di specialiscj, e provarà a rispuindi ae domande: **“Cuâl isal il rûl des lenghis minoritariis intes economiis europeanis?”** e a descrivi lis potenzialitâts dal multilinguism tant che fatôr di cressite economiche e ocupazionâl intes regjons di Europe. Ospit di onôr dal avigniment anuâl propit il Friûl-VJ che al podarà contâsi a 360 grâts devant di une platee di esperts che a vegnin di ducj Paîs europeans.

«La jentrade dal Consei regjonâl dal Friûl-VJ intal Npld e je stade une decision politiche impuartante – al dîs il president de ARLeF, Lorenzo Fabbro –. Si è tratât dal just ricognossiment de cuistion dal plurilinguism dal nestri teritori, un teme che su chel al è cence altri necessari condividi relazions, strategjiis e buinis praticis a nivel european. Graciis al lavôr di rêt intal Npld, la nestre comunitât e je cumò plui preparade a cjapâ sù une serie di oportunitâts impuartantis in teme di finanziaments, cooperazion, cognossince e, ancje, a rinfuarçâ la proprie visibilitât in ambit european».

«Il nestri Consei regjonâl al è une des pocjis assembleis legjislativis che a àn aderît ae rêt Npld – al zonte Franco Iacop, president dal Consei regjonâl -, un pas dovût in considerazion dal ricognossiment che il furlan al à vût a nivel nazionâl, ma che rispjet a chel o vin di cjâlâ indenant. La impuartance di operâ tant che diversitât linguistiche intal contest des Istituzions europeanis e dal Europarlament, e permet di valorizâ lis lenghis regjonâls tant che oportunitât par favorî il dialic interculturâl tra i varis popui dal continent».

La zornade e tacarà aes 9.15, inte **sede prestigjose dal Comitât des Regjons**, cui **salûts dal president di Npld, il basc Patxi Bazterrika, di Claudio Violino, “ambassadôr” dal Consei regjonâl dal Friûl-VJ e dal president de AReF, Lorenzo Fabbro**. La relazion panoramiche su la situazion des minorancis linguistichis in Italie e je stade rimetude al linguist Giovanni Agresti de Facoltât di Siencis politichis de Universitât di Teramo, intant che il diretôr de ARLeF, William Cislino, si interessarà de minorance furlane, Zaira Vidau (Slori) di chê slovene e Monica Cecchin (KKV) di chê todescje. Finidis lis relazions e la discussion, il dopomisdì al sarà dedicât a une taule taronde cun sîs esperts che a ilustraran cualchi buine pratiche metude in at in Irlanda, Paîs Bascs, Italie e Bretagne propit inte otiche dal disvilup economic e ocupazionâl di chês areis dulà che a son inlidrisadis lis lenghis di minorance.

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<

Tacant des 18.00, la serade e larà indevant li dal **Ufici di colegament de Regjon Friûl-VJ** e e sarà dal dut dedicate al **“Furlan, lenghe de Europe”**, cu la visite ae biele mostre fate di **13 paneli (par furlan e par inglês)** che a ilustrin la storie, la culture, la comunicazion e la **politiche linguistiche metude in vore intal teritori furlanofon**, curade di William Cisilino.

In fin, la presentazion de publicazion (par furlan e par talian), curade di Giovanni Agresti, fondadôr de Associazion Lem-Italia (Futura Edizioni), dal titul **“99 domandis: diversitât linguistiche e dirits linguistics”**. In sieradure de serade, **l’Ersa al presenterà cualchi prodot tipic de nestre regjon** e i ospits de Npld a podaran assisti a un **conciert dal cjantautôr furlan Loris Vescovo**.

Ce che al è il Npld

Dal prin di Lui dal 2014, il Consei regjonâl dal Friûl-VJ al è jentrât in maniere uficiâl a fâ part dal Network to promote linguistic diversity - Npld, plateforme operative cofinanziade de Comission Europeane, create par sostignî, tutelâ e promovî lis lenghis minoritariis e regjonâls di dute Europe (cun funzions, ancje, di consulence su lis politichis linguistichis), cul scambi di buinis praticis e informazions tra i esperts dal setôr. Ae ARLeF al è stât assegnât il rûl operatîf di gjestion, organizazion e supuart ae Regjon intes ativitâts dal Npld.

La rêt si compon di un grant numar di lenghis, includudis chês uficiâls de Union europeane, tant che la estone, la irlandese, il svedês o il finlandês; lis lenghis cun status uficiâl intai lôr teritoris tant che basc, catalan, galizian, galês, frison, e altris di comunitâts linguistichis cence ricognossiment uficiâl, tant che breton, cors, ocitan, cornish o sami, par une popolazion di plui di 27 milions di personis.

Npld al cjape dentri dutis lis lenghis costituzionâls, regjonâls, di minorance e lis lenghis presintis in teritoris limitâts, e ancje istituzions, ents publics, associazions, universitât e organizacions presintis te societât, che a operin intal setôr de diversitât linguistiche e dal multilinguism in Europe.

Udin, ai 25 di Otubar dal 2016

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<